

30/05/2003

RM2.85b untuk 400,000 petani

Badrila Jamlus

KUALA LUMPUR: Kementerian Pertanian yang memperuntukkan dana berjumlah RM2.85 bilion di bawah Pakej Strategi Baru akan mengagihkan keseluruhan dana yang dijangka memberi manfaat kepada kira-kira 400,000 petani, penternak, nelayan dan usahawan di seluruh negara itu, dalam tempoh setahun daripada sekarang.

Menteri Pertanian, Datuk Effendi Norwawi, berkata peruntukan itu yang akan menjana pendapatan kira-kira RM5 bilion kepada negara akan digunakan bagi melaksanakan beberapa projek yang sudah dikenal pasti dalam sektor perladangan, penternakan dan perikanan.

Beliau berkata, sejumlah RM1 bilion diperuntukkan kepada Bank Pertanian Malaysia bagi projek Tabung untuk Makanan (3F), skim kredit mikro (RM500 juta), Amanah Ikhtiar Malaysia (RM300 juta), dana untuk memperbaiki sistem penghantaran (RM300 juta) dan RM750 juta bagi pembinaan bot nelayan.

"Pembabitan 13 agensi di bawah kementerian akan bersama-sama menggembelngkan tenaga untuk menggerakkan sektor pertanian dengan lebih agresif bagi merangsangkan pertumbuhan ekonomi negara sekali gus meningkatkan pendapatan golongan petani.

"Kementerian juga memperuntukkan beberapa dana lain seperti agropelancongan, pembangunan usahawan pertanian dan pembangunan jenama," katanya di Kuala Lumpur, semalam.

Beliau berkata demikian dalam taklimat khas media bagi menjelaskan perancangan kementerian mengenai peruntukan diterima daripada Pakej Strategi Baru berjumlah RM7.3 bilion yang diumumkan Perdana Menteri, Datuk

Seri Dr Mahathir Mohamad 21 Mei lalu.

Di bawah peruntukan kepada sektor perikanan, sebanyak RM700 juta akan membiayai pembinaan bot nelayan laut dalam bagi menggantikan 252 unit bot yang disewa dari Thailand.

Beliau berkata, bot itu akan menggunakan peralatan dan kelengkapan moden yang akan mampu membawa hasil tangkapan sebanyak 60,000 tan metrik ikan setahun bernilai RM200 juta, manakala 6,000 hingga 8,000 bot gentian kaca baru bernilai RM10,340 seunit akan turut dibina bagi kegunaan nelayan tradisional.

Selain itu, sektor perikanan juga akan mendapat peruntukan sebanyak RM12.6 juta bagi program pemuliharaan kolam membabitkan kawasan seluas 350 hektar kolam terbiar dengan 500 penternak.

"Menerusi pakej ini, kerajaan akan membiayai pemulihan dalam masa singkat 1,200 kolam yang dikenal pasti dan langkah itu dijangka memberi pulangan sebanyak RM27 juta setahun selepas semua kolam beroperasi sepenuhnya," katanya.

Effendi berkata, kerajaan juga memperuntukkan RM60 juta bagi program

membangunkan kawasan seluas 5,000 hektar untuk dijadikan Zon Industri Akuakultur (ZIA) yang akan membawa pulangan pendapatan kepada negara berjumlah RM150 juta setahun.

Beliau berkata, Lembaga Kemajuan Ikan Malaysia (LKIM) pula memerlukan peruntukan RM17 juta untuk membaiki 77 jeti dan membina 27 jeti baru di seluruh negara yang bakal memberi manfaat kepada 84,000 nelayan.

Katanya, sebanyak RM270 juta pula akan digunakan bagi meningkatkan tahap sistem pengairan dan saluran serta jalan raya ke kawasan perladangan.

Beliau berkata, Jabatan Pertanian yang menerima peruntukan RM73 juta akan mengagihkan dana itu kepada 2,938 petani membabitkan kawasan pertanian seluas 8,055 hektar dan dijangka menjana nilai bersih RM347 juta setahun.

Sebanyak RM32 juta akan disalurkan bagi projek Taman Kekal Pengeluaran Makanan (TKPM); projek tanah terbiar (RM22.5 juta); ladang satelit (RM3 juta); projek nanas (RM3 juta); Industri Kecil dan Sederhana (IKS) berjumlah RM9.6 juta serta projek tanaman pokok Roselle berjumlah RM2.5 juta.

Bagi Jabatan Perkhidmatan Haiwan (JPH), sebanyak RM42.73 juta diperlukan untuk menjana pelbagai aktiviti berkaitan industri penternakan khususnya pengeluaran daging lembu, ayam, susu dan makanan haiwan.

"Daripada 173 peserta yang terbabit, sebanyak 64 peratus membabitkan pengeluaran daging lembu manakala sebanyak 20 peratus dalam pengeluaran susu dan enam peratus bagi pengeluaran daging kambing.

"Sejumlah RM8.6 juta diperlukan untuk menjayakan program ini yang akan menjana pendapatan bulanan antara RM1,000 hingga RM1,500 kepada setiap peserta," katanya.